

Ár 2017, þriðjudaginn 20. júní, var fundur í kjararáði að Hverfisgötu 6a í Reykjavík haldinn af Jónasi Þór Guðmundssyni, Huldu Árnadóttur og Svanhildi Kaaber.

Fyrir var tekið:

Að ákveða laun og starfskjör hagstofustjóra

I.

Samkvæmt 1. gr. laga nr. 47/2006 um kjararáð, sbr. 1. gr. laga nr. 168/2007 um breyting á þeim lögum, er verkefni þess meðal annars að ákveða laun forstöðumanna ríkisstofnana. Hagstofustjóri er á lista fjármála- og efnahagráðherra yfir forstöðumenn samkvæmt 2. mgr. 22. gr. laga um réttindi og skyldur starfsmanna ríkisins nr. 70/1996. Heyrir því undir kjararáð að ákveða hagstofustjóra laun.

II.

Kjararáði barst bréf dagsett 19. september 2016 frá hagstofustjóra. Í bréfinu er farið fram á að kjararáð endurskoði launakjör hagstofustjóra þar sem þau hafi dregist aftur úr kjörum annarra forstöðumanna sem og launum sem tíðkist almennt í þjóðfélaginu hjá þeim sem hafi með höndum álíka viðamikil störf og ábyrgð. Þá segir í bréfinu að fjallað sé um störf hagstofustjóra í lögum nr. 163/2007 um Hagstofu Íslands og opinbera hagskýrslugerð og einnig í auglýsingu B-deildar Stjórnartíðinda nr. 578/2006 um gildistöku verklagsreglna í hagskýrslugerð. Er í bréfinu sérstaklega vísað til fyrstu meginreglu verklagsreglnanna þar sem fjallað sé um faglegt sjálfstæði hagskýrsluvalda og ábyrgð hagstofustjóra. Einnig er vísað til ársskýrslna Hagstofu Íslands.

Með bréfum dagsettum 27. september 2016 var forsætisráðuneyti og fjármála- og efnahagsráðuneyti gefinn kostur á að leggja fram greinargerðir vegna erindisins, sbr. 6. gr. laga um kjararáð.

Fjármála- og efnahagsráðuneytið sendi kjararáði bréf dagsett 1. nóvember 2016. Í bréfinu segir að ráðuneytinu sé ekki kunnugt um á hvern hátt starfsemi stofnunarinnar hafi breyst eða aukist frá því að kjararáð úrskurðaði síðast um laun hagstofustjóra að öðru leyti en fram komi í bréfi hans. Telur ráðuneytið eðlilegt að kjararáð horfi til þess auk annarra viðmiðana við athugun á því hvort endurskoða skuli laun hans.

Forsætisráðuneytið sendi kjararáði bréf dagsett 28. nóvember 2016. Í bréfinu er tekið undir sjónarmið hagstofustjóra og lýsir ráðuneytið stuðningi við að launakjör hans verði endurskoðuð.

Með bréfi dagsettu 5. desember 2014 fékk hagstofustjóri send framangreind bréf ráðuneytanna til kynningar og honum gefinn kostur á að koma á framfæri athugasemdum við efni þeirra. Í tölvubréfi hagstofustjóra dagsettu 8. desember 2016 eru ekki gerðar athugasemdir við bréf ráðuneytanna.

III.

Hagstofa Íslands starfar samkvæmt lögum nr. 163/2007 um Hagstofu Íslands og opinbera hagskýrslugerð. Hagstofa Íslands er sjálfstæð stofnun sem heyrir undir ráðherra og vinnur að opinberri hagskýrslugerð samkvæmt lögnum. Hún er miðstöð opinberrar hagskýrslugerðar í landinu og hefur forystu um tilhögun, samræmingu og framkvæmd hennar svo og um samskipti við alþjóðastofnanir um hagskýrslu- og tölfraðimál. Með opinberri hagskýrslugerð er átt við starfsemi Hagstofunnar og annarra bærra ríkisstofnana sem lýtur að söfnun gagna til tölfraðilegrar úrvinnslu um landshagi Íslands og þjóðfélagsleg málefni, úrvinnslu gagnanna og miðlun tölfraðilegra upplýsinga til almennings, fyrirtækja, stofnana og stjórnvalda á

grundvelli laga og í samræmi við fyrirmæli sett samkvæmt áðurnefndum lögum um Hagstofu Íslands og opinbera hagskýrslugerð.

Við Hagstofu Íslands skal starfrækja sjálfstæða rannsóknareiningu sem er aðskilin hagskýrslustarfseminni. Rannsóknareiningin skal fylgjast með afkomu þjóðarbúsins og semja þjóðhagsspár og áætlanir sem birta skal opinberlega.

Hagstofan skal ákveða hagskýrsluverkefni sín og forgangsraða með hliðsjón af þörfum stjórnvalda fyrir tölfraðilegar upplýsingar til stefnumótunar og ákvarðana um þjóðfélagsmál, alþjóðlegum skuldbindingum ríkisins um gerð hagskýrslna og af þörfum og óskum almennings, aðila vinnumarkaðarins, atvinnurekstrar og rannsóknar- og menntastofnana fyrir tölfraðilegar upplýsingar. Í þessu skyni skal stofnunin hafa virkt samráð við þessa aðila. Hagstofan annast samræmingu opinberrar hagskýrslugerðar sem hún og aðrar ríkisstofnanir hafa með höndum.

Hagstofan skipuleggur starfsemi sína og einstök verkefni innan þess ramma sem ræðst af fjárveitingum á fjárlögum, öðrum framlögum og eigin tekjum. Hagstofunni er heimilt að afla sértekna og taka gjald fyrir sérþjónustu í hagskýrslugerð og þjónustu við rannsóknaraðila og aðra gagnabeiddendur svo og vegna hagnýtingar á upplýsingakerfum stofnunarinnar og þjónustu í því sambandi. Hagstofunni er heimilt að krefja stjórnvöld, stofnanir, fyrirtæki og einstaklinga í atvinnurekstri um gögn og upplýsingar sem hún þarfnast til hagskýrslugerðar sinnar samkvæmt lögum um Hagstofu Íslands og er þeim skylt að veita henni upplýsingarnar á því formi sem hún óskar eftir eða um semst og innan þeirra tímamarka sem hún ákveður. Hagstofan skal jafnan upplýsa í hvaða tilgangi gagna er aflað, hvernig úrvinnslu verði háttað, gögn varðveitt og niðurstöður birtar. Skirrist einhver við að veita Hagstofunni umbeðnar upplýsingar er henni heimilt að gera hlutaðeigandi skylt að fullnægja upplýsingaskyldu sinni að viðlögðum dagsektum.

Hagstofunni stýrir hagstofustjóri sem skipaður er af ráðherra til fimm ára í senn. Hagstofustjóri skal hafa lokið háskólaprófi í hagfræði, tölfraði, félagsfræði eða skyldum greinum og hafa þekkingu og reynslu af hagskýrslugerð eða notkun hagtalna. Hagstofustjóri ræður aðra stjórnendur og starfslid Hagstofunnar. Hann er ábyrgur fyrir rekstri stofnunarinnar og skipuleggur starfsemi hennar. Þá ber hann faglega ábyrgð á allri hagskýrslugerð Hagstofunnar.

Samkvæmt lögum nr. 123/2015 um opinber fjármál situr hagstofustjóri í reiknings-skilaráði ríkisins fyrir A-hluta.

IV.

Í 8. gr. laga um kjararáð segir, að það skuli við úrlausn mála gæta innbyrðis samræmis í starfskjörum þeim sem það ákveður, og að þau séu á hverjum tíma í samræmi við laun í þjóðfélaginu hjá þeim sem sambærilegir geta talist með tilliti til starfa og ábyrgðar. Við ákvörðun sína skuli kjararáð gæta þess að föst laun fyrir dagvinnu, annarra en forseta Íslands, verði ekki hærri en föst laun forsætisráðherra samkvæmt 3. gr. Við ákvörðun launakjara samkvæmt 4. gr. laganna skuli sérstaklega gæta samræmis milli þeirra og þeirra kjara hjá ríkinu sem greidd eru á grundvelli kjarasamninga annars vegar og ákvarðana kjararáðs samkvæmt 3. gr. hins vegar. Þá skuli kjararáð ætíð taka tillit til almennrar þróunar kjaramála á vinnumarkaði. Í 10. gr. laganna segir að ráðið skuli taka mál til meðferðar þegar því þyki þurfa og ætíð ef orðið hafa verulegar breytingar á þeim launum í þjóðfélaginu sem höfð skulu til viðmiðunar samkvæmt lögnum eða á störfum þeirra sem úrskurðarvald þess tekur til.

Kjararáð ákvað hagstofustjóra laun 29. janúar 2015. Frá þeim tíma hafa laun hans tekið breytingum í samræmi við almennar ákvarðanir kjararáðs. Með vísan til þess sem að framan

greinir um starfsemi Hagstofu Íslands sem og þess innbyrðis samræmis sem kjararáði ber að hafa að leiðarljósi og áður er gerð grein fyrir hefur kjararáð ákveðið að laun og önnur starfskjör hagstofustjóra skuli vera svo sem segir í ákvörðunarorði.

V.

Ákvörðunarorð

Frá og með 1. október 2016 skulu mánaðarlaun hagstofustjóra vera samkvæmt launatöflu kjararáðs nr. 502, launaflokki 141, nú 1.131.816 krónur. Að auki skal greiða honum 35 einingar á mánuði fyrir alla yfirvinnu er starfinu fylgir.

Eining er 1% af launaflokki 136 í launatöflu kjararáðs nr. 502, nú 9.572 krónur. Einingar greiðast alla mánuði ársins, einnig í sumarleyfi. Af því leiðir að ekki er greitt orlofsfé á einingar.

Laun eru við það miðuð að um fullt starf sé að ræða og þannig ákveðin að ekki komi til frekari greiðslna nema kjararáð úrskurði um það sérstaklega.

Um almenn starfskjör hagstofustjóra gilda reglur kjararáðs frá 17. nóvember 2015.

Jónas Þór Guðmundsson

Hulda Árnadóttir

Svanhildur Kaaber